

摘藻堂四庫全書薈要

集部

欽定四庫全書薈要

集部

東坡全集卷二十七

八

詳校官助教臣常循



欽定四庫全書薈要卷一萬四千八百五十九

集部

東坡全集卷二十七

宋 蘇軾 撰

詩六十六首

次韻答荆門張都官維見和惠泉詩

  
少井飲地氣常不洩蓄之為惠泉全若有所折泉

源本無情豈問濁與澈貪愚彼二水終古恥莫雪只應  
所處然遂使語異別泉旁地平衍泉上山巒嶽君子慎  
所居此義安可闕古人貴言贈敢用況高節不為冬霜

乾肯畏夏日烈泠泠但不已海遠要當徹

瀏陽早發

富貴本先定世人自榮枯囂囂好名心嗟我豈獨無不  
能便退縮但使進少徐我行念西國已分田園蕪南來  
竟何事碌碌隨商車自進苟無補乃是懶且愚人生重  
意氣出處夫豈徒永懷江陽叟種藕春滿湖

夜行觀星

天高夜氣嚴列宿森就位大星光相射小星鬧若沸天

人不相干嗟彼本何事世俗強指擿一一立名字南箕  
與北斗乃是家人器天亦豈有之無乃遂自謂迫觀知  
何如遠想偶有似茫茫不可曉使我長歎喟

漢水

捨棹忽逾月沙塵困遠行襄陽逢漢水偶似蜀江清蜀  
江固浩蕩中有蛟與鯨漢水亦云廣欲涉安敢輕文王  
化南國遊女儼如卿洲中浣紗子環珮鏘鏘鳴古風隨  
世變寒水空泠泠過之不敢慢佇立整冠纓

萬山

西行度連山北出臨漢水漢水感成潭旋轉山之趾禪  
房久已壞古甃含清泚下有仲宣欄綆刻深容指回頭  
望西北隱隱龜背起傳云古隆中萬樹桑柘美月炯轉  
山曲山上見洲尾綠水帶平沙盤盤如抱珥山川近且  
秀不到懶成恥問之安能詳畫地費簪筓

隆中

諸葛來西國千年愛未衰今朝遊故里蜀客不勝悲誰

言襄陽野生此萬乘師山中有遺貌矯矯龍之姿龍蟠  
山水秀龍去淵潭移空餘蜿蜒迹使我寒涕垂

竹葉酒

楚人汲漢水釀酒古宜城春風吹酒熟猶似漢江清者  
舊何人在丘墳應已平惟餘竹葉在留此千古情

鱖魚

曉日照江水遊魚似玉甍誰言解縮頸貪餌每遭烹杜  
老當年意臨流憶孟生吾今又悲子輟筋涕縱橫

望夫臺

在忠州南  
數十里

山頭孤石遠亭亭江轉船回石似屏  
可憐千古長如昨  
船去船來自不停浩浩長江赴滄海  
紛紛過客似浮萍  
誰能坐待山月出照見寒影高伶俜

永安宮

今夔之永安門  
即宮之遺址

千古陵谷變故宮安得存徘徊問耆老  
惟有永安門遊  
人雜楚蜀車馬晚喧喧不見重樓好  
誰知昔日尊吁嗟  
蜀先主兵敗此亡魂只應法正死使公去遭燔



八陣磧

平沙何茫茫髣髴見石筮縱橫滿江上歲歲沙水齧孔  
明死已久誰復辨行列神兵非學到自古不留訣至人  
已心悟後世徒妄說自從漢道衰蜂起盡奸傑英雄不  
相下禍難久連結驅民市無煙戰野江流血萬人賭一  
擲殺盡如沃雪不為久遠計草草常無法孔明最後起  
意欲掃羣孽崎嶇事節制隱忍久不決志大遂成迂歲  
月去如瞥六師紛未整一旦英氣折唯餘八陣圖千古

壯夔峽

諸葛鹽井

井有十四自山下至山上其十三井常空盛夏水漲則鹽泉迤邐遷去常

去於江水之所不及

五行水本鹹安擇江與井如何不相入此意復誰省人心固難足物理偶相逞猶嫌取未多井上無閒綆

穎大夫廟

人情難強回天性可微感世人爭曲直苦語費搖撼大  
夫言何柔暴主意自慘荒祠旁孤塚古隧有殘坎千年

惟茅焦世亦貴其膽不解此微言脫衣徒勇敢

許州西湖

西湖小雨晴灑灑春渠長來從古城角夜半傳新響使  
君欲春遊浚沼役千掌紛紜具畚鍤鬧若蟻運壤天桃  
弄春色生意寒猶快唯有落殘梅標格若矜爽遊人全  
已集挈榼三且兩醉客卧道傍扶起尚偃仰池臺信宏  
麗貴與民同賞但恐城市歡不知田野愴潁川七不登  
野氣長蒼莽誰知萬里客湖上獨長想

江上值雪效歐陽體限不以鹽玉鶴鷺絮蝶飛  
舞之類為比仍不使皓白潔素等字

縮頸夜眠如凍龜雪來唯有客先知江邊曉起浩無際  
樹杪風多寒更吹青山有似少年子一夕變盡滄浪髭  
方知陽氣在流水沙上盈尺江無漸隨風顛倒紛不擇  
下滿坑谷高陵危江空野闊落不見入戶但覺輕絲絲  
沾裳細看若刻鏤豈有一一天工為霍然一麾遍九野  
吁此權柄誰執持世間苦樂知有幾今我幸免沾膚肌

山夫只見壓樵擔，豈知帶酒飄歌兒。天王臨軒喜有麥，宰相獻壽嘉及時。凍吟書生筆欲折，夜織貧女寒無幃。高人著履踏冷冽，飄拂巾帽真仙姿。野僧斫路出門去，寒液滿鼻清淋漓。洒袍入袖濕靴底，亦有執版趨階墀。舟中行客何所愛，願得獵騎當風披。草中咻咻有寒兔，孤隼下擊千夫馳。敲冰煮鹿最可樂，我雖不飲強倒卮。楚人自古好弋獵，誰能往者我欲隨。紛紜旋轉從滿面，馬上操筆為賦之。

渚宮

渚宮寂寞依古郢楚地  
荒茫非故基二王臺閣已鹵莽

湘東王高氏

何況遠問縱橫時  
楚王獵罷擊靈鼓  
猛士操舟

張水嬉釣魚不復數  
魚鼈大鼎烹蛟螭  
當時郢人架宮殿  
意思絕妙般與倕  
飛樓百尺照湖水上  
有燕趙千娥眉  
臨風揚揚意自得  
長使宋玉作楚詞  
秦兵西來取鍾簾  
故宮禾黍秋離離  
千年壯觀不可復  
今之存者蓋已卑  
池空野迥樓閣小  
惟有深竹藏狐狸  
臺中絳帳

誰復見臺下野水

一作鴨

浮清漪綠窻朱戶春晝閑想見

深屋彈朱絲腐儒亦解愛聲色何用白首談孔姬沙泉  
半涸草堂在破窻無紙風颭颭陳公蹤跡最未遠七瑞  
寥落今何之百年人事知幾變直恐荒廢成空陂誰能  
為我訪遺迹草中應有湘東碑

### 出峽

入峽喜巉崿出峽愛平曠吾心淡無累遇境即安暢東  
西徑千里勝處頗屢訪幽尋遠無厭高絕每先上前詩

尚遺略不錄久恐忘憶從巫廟回中路寒泉漲汲歸真  
可愛翠碧光滿盞忽驚巫峽尾巖腹有穿壙仰見天蒼  
蒼石室開南嚮宣尼古廟宇叢木作幃帳鐵楯橫半空  
俯瞰不計丈古人誰架構下有不測浪石竇見天困瓦  
棺悲古葬新灘阻風雪村落去攜杖亦到龍馬溪茆屋  
沽村釀玉虛悔不至實為舟人誑聞道石最奇寤寐見  
恠狀峽山富奇偉得一知幾喪苦恨不知名歷歷但想  
像今朝脫重險楚水渺平蕩魚多客庖足風順行意王



追思偶成篇聊助舟人唱

神女廟

大江從西來上有千仞山江山自環擁恢詭富神姦深  
淵鼉鼉橫去聲巨壑蛇龍頑旌陽斬長蛟雷雨移蒼灣蜀

守降老蹇至今帶連環縱橫若無主蕩逸侵人寰上帝  
降瑤姬來處荆巫間神仙豈在猛玉座幽且閒飄蕭駕  
風馭弭節朝天關倏忽巡四方不知道里艱古粧具法  
服邃殿羅煙鬟百神自奔走雜沓來趨班雲興靈恠聚

金夕口月全三  
卷二十七  
雲散鬼神還茫茫夜潭靜皎皎秋月彎還應搖玉珮來  
聽水潺潺

巫山

瞿塘迤邐盡巫峽崢嶸起連峯稍可恠石色變蒼翠天  
工運神巧漸欲作奇偉塊軋勢方深結構意未遂旁觀  
不暇瞬步步造幽邃蒼崖忽相逼絕壁凜可悸仰觀八  
九頂俊爽凌顛氣晃蕩天宇高崩騰江水沸孤超死不  
讓直拔勇無畏攀緣見神宇憩坐就石位巉巉隔江波

一一問廟吏遙觀神女石綽約誠有以俯首見斜鬟拖  
霞弄脩帔人心隨物變遠覺含深意野老笑吾旁少年  
嘗屢至去隨猿猱上反以繩索試石笋倚孤峰突兀殊  
不類世人喜神恠論說驚幼稚楚賦亦虛傳神仙安有  
是次問掃壇竹云此今尚爾翠葉紛下垂婆婆綠鳳尾  
風來自偃仰若為神物使絕頂有三碑詰曲古篆字老  
人那解讀偶見不能記窮探到峯背採斫黃楊子黃楊  
生石上堅瘦紋如綺貪心去不顧澗谷千尋縋山高虎

狼絕深入坦無忌洪濛草樹密葱蘢雲霞膩石竇有洪  
泉甘滑如流髓終朝自盥漱冷冽清心胃浣衣掛樹梢  
磨斧就石鼻徘徊雲日晚歸意念城市不到今十年衰  
老筋力憊當時伐殘木牙蘖已如臂忽聞老人說終日  
為嘆喟神仙固有之難在忘勢利貧賤爾何愛棄去如  
脫屣嗟爾苦無還絕糧應不死

觀大水望朝陽巖作

朝陽巖前不結廬下眺江水百步餘春泉濺濺出乳竇

青莎白石半滄涂不到津頭二三日誰知江水漲天墟  
遙望橫盃不敢濟巖口正有人罾魚

滄洲亭懷古

湘水悠悠天際來夾江古木抱山回城中人物若可數  
日晏市散多蒼苔九嶷巉天古雲埋遙想帝子龍車迴  
心衰目極何可望九歌寂寂令人哀

栢家渡

栢家渡西日欲落青山上下猿鳥樂欲因新月望吳雲

遙看北斗掛南嶽一夢惛惛四十秋  
古人不死終未休  
草舍蕭條誰與語香風欲過白蘋洲

清遠舟中寄耘老

小寒初渡梅花嶺萬壑千巖背人境  
清遠聊為泛宅行  
一夢分明墮鄉井覺來滿眼是湖山  
鴨綠波搖鳳凰影  
海陵居士無雲梯歲晚結廬潁水湄  
山腰自懸蒼玉珮  
野馬不受黃金羈門前車蓋獵獵走  
笑倚清流數鬢絲  
汀洲相見春風起白蘋吹花散煙水  
萬里飄蓬未得歸

目斷滄浪淚如洗北雁南來遺素書苦言大浸沒我廬  
清齋十日不燃鼎曲突往往巢龜魚今年玉粒賤如水  
青銅欲買囊已虛人生百年如寄爾七十朱顏能有幾  
有子休論賢與愚倪生枉却帶經鋤天南看取東坡叟  
可是平生廢讀書

書堂嶼

蒼山古木書堂嶼北出湘水百餘步誰為往來虧世界  
至今人指安禪處豈無驚蛇與飛鳥後來那復知其趣

不知我身今是否空記名稱作常住

醉睡者

有道難行不如醉有口難言不如睡先生醉卧此石間  
萬古無人知此意

戲詠子舟畫兩竹兩鸚鵡

風晴日暖搖雙竹竹間對語雙鸚鵡鸚鵡之肉不可食  
人生不才果為福子舟之筆利如錐千變萬化皆天機  
未知筆下鸚鵡語何似夢中蝴蝶飛



老翁井

井中老翁誤年華白沙翠石公之家公來無蹤去無跡  
井面團圓水生花翁今與世兩何與無事紛紛驚牧豎  
改顏易服與世同無使世人知有翁

贈山谷子

黃童三尺世無雙筆頭袞袞懸秋江不憂老子難為父  
平生崛起今心降我來喜共阿戎語應敵縱橫如急雨  
生子還如孫仲謀豚犬謾多何足數黃家小兒名拾得

眉如長松眼如漆只今數歲已動人老人留眼看他日  
笑君老蚌生明珠自笑此物吾家無君當置酒我當賀  
有兒傳業更何須

觀子玉郎中草聖

柳侯運筆如電閃子雲寒悴羊欣儉百斛明珠便可扛  
此書非我誰能雙

鰻魚行

漸臺人散長弓射初噉鰻魚人未識西陵衰老總帳空

肯向北河親饋食兩雄一律盜漢家嗜好亦若肩相差  
食每對之先太息不因噎嘔緣瘡痂中間霸據關梁隔  
一枚何啻千金直百年南北鮭菜通往往殘餘飽臧獲  
東隨海舶號倭螺異方珍寶來更多磨沙淪瀋成大截  
剖蚌作脯分餘波君不聞蓬萊閣下馳碁島八月邊風  
備胡獠船舶跋浪鼉鼉震長鏡鏟處崖谷倒膳夫善治  
薦華堂坐令雕俎生輝光肉芝石耳不足數醋芼魚皮  
真倚牆中都貴人珍此味糟浥油藏能遠致割肥方厭

萬錢廚決皆可醒  
千日醉三韓  
使者金鼎來  
方奩饋送  
煩輿臺  
遼東太守遠  
自獻臨菑掾  
吏誰為材  
吾生東歸  
收一斛包苴  
未肯鑽華屋  
分送羹材作  
眼明却取細書  
防老讀

次韻水官詩

并引

淨因大覺禪師以閣立本畫水官遺編禮公公既報之  
以詩謂某汝亦作某頓首再拜次韻仍錄二詩為一卷  
以獻

水官騎蒼龍龍行欲上天手攀時且住浩若乘風船不  
知幾何長足尾猶在淵下有二從臣左右乘魚鼉雙鑠  
相顧視風舉衣袂翻女子侍君側白頰垂雙鬟手執雉  
尾扇容如未開蓮從者八九人非鬼非戎蠻出水未成  
列先登揚旗旌長刀擁旁牌白羽注強拳雖服甲與裳  
狀貌猶鯨鱸水獸不得從仰面以手扳空虛走雷霆雨  
電晦九川風師黑虎囊面目昏塵煙翼從三神人萬里  
朝天關我從大覺師得此詭恠編畫者古閣子于今三

百年見者誰不愛予者誠已難在我猶在子此理寧非  
禪報之以好詞何必畫在前

老泉

高人豈學畫用筆乃其天譬如善游人一一能操船閤  
子本逢掖疇昔慕雲淵丹青偶為戲染指初嘗寵愛之  
不自己筆勢如風翻傳聞貞觀中左袵解袿鬟南夷羞  
白雉佛國貢青蓮詔令擬王會別殿寫戎蠻熊冠金絡  
額豹袖擁旛旛傳入應門內俯伏脫劍拳天姿儼龍鳳  
雜沓朝鵬鱣神功與絕跡後世兩莫扳自從李氏亡羣

盜竊山川長安三日火至寶隨飛煙尚有脫身者漂流  
出東關三官豈容獨得此今已編吁嗟至神物會合當  
有年京城諸權貴欲取百計難贈以玉如意豈能動高  
禪信應一篇詩皎若畫在前

弔徐德占并引

余初不識德占但聞其初為呂惠卿所薦以處士用元  
豐五年三月偶以事至蘄水德占聞余在傳舍惠然見  
訪與之語有過人者是歲十月聞其遇禍作詩弔之

美人種松柏欲使低映門栽培雖易長流惡病其根哀  
哉歲寒姿骯髒誰與倫竟為明所悞不免刀斧痕一遭  
兒女汚始覺山林尊從來覓棟梁未免傍籬藩南山隔  
秦嶺千樹龍蛇奔大厦若果傾萬牛何足言不然老巖  
壑合抱枝生孫死者不可悔吾將遺後昆

題李伯時淵明東籬圖

彼哉嵇阮曹終以明自膏靖節固昭曠歸來侶蓬蒿新  
霜着疎柳大風起江濤東籬理黃華意不在芳醪白衣



挈壺至徑醉還遊遨悠然見南山意與秋氣高

李白謫仙詩

我居青空裡君隱黃埃中聲形不相弔心事難形容欲  
乘明月光訪君開素懷天盃飲清露展翼登蓬萊佳人  
持玉尺度君多少才玉尺不可盡君才無時休對面一  
笑語共躡金鰲頭絳宮樓闕百千仞霞衣誰與雲煙浮  
數日前夢一僧出二鏡求詩僧以鏡置日中其  
影甚異其一如芭蕉其一如蓮花夢中與作

詩

君家有二鏡光景如湛盧或長如芭蕉或圓如芙蓉飛  
電着子壁明月入我廬月下合三壁日月跳明珠問子  
是非我我是非文殊

飲酒四首

我觀人間世無如醉中真虛空為銷殞況乃百憂身惜  
哉知此晚坐令華髮新聖人驟難得日且致賢人

左手持蟹螯舉觴矚雲漢天生此神物為我洗憂患山

川同恍惚魚鳥共蕭散客至壺自傾欲去不得間  
有客遠方來酌我一甌茗我醉方不啜強啜忽復醒既  
鑿混沌氏遂遠華胥境操戈逐儒生舉觴還酌酊  
雷觴淡於水經年不濡唇爰有擾龍裔為造英靈春英  
靈韻甚高蒲萄難與鄰他年血食汝當配杜康神

大雪獨留尉氏

古驛無人雪滿庭有客冒雪來自北紛紛笠上已盈寸  
下馬登堂面蒼黑苦寒有酒不能飲見之何必問相識

我酌徐徐不滿觥看客倒盡不留濕千門晝閉行路絕  
相與笑語不知夕醉中不復問姓名上馬忽去橫短策

阮籍嘯臺

在尉氏

阮生古狂達遁世默無言猶餘胸中氣長嘯獨軒軒高  
情遺萬物不與世俗論登臨偶自寫激越蕩乾坤醒為  
嘯所發飲為醉所昏誰能與之較亂世足自存

留別叔通元弼坦夫

田三昔同寮向我每傾倒當年或齟齬反覆看愈好寇

三我部民孝悌化隣保有如袁伯業苦學到衰老石生  
吾邑子勁立風中草宦遊甌生塵菽水媚翁媪我窮交  
舊絕計拙集枯槁三子尤見存往復紛紜縞迎我淮水  
北送我睢陽道願存金石契凜凜貫華皓

余歸自道場何山遇大風因憩耘老溪亭命官  
奴秉燭捧硯寫風竹一枝題詩云

更將掀舞勢把燭畫風篠美人為破顏憐此腰肢裊

和寄天選長官

寓形宇宙間，佚我方以老。流光安足恃，百歲同過鳥。頃

子縈網羅，文采緣自表。自古山林人，何曾識機巧。但記

寒巖翁，論心秋月皎。黃香十年舊，禪學參衆妙。虛懷養

天和，肯徇奔走鬧。官居職事理，晨起何用早。桐陰滿西

齋，叱吏供灑掃。眷予東南來，野飯煮芹蓼。葆光既清尚

令尹亦高蹈，相將古寺行。軟語頽晚照，公家有畸人。有公

族人隱

虛緣能自保，卜築嵩山陽。何行一作當從結好中

山饒勝景一覽未易飽，何時命中車。共陟雲外嶠，翻然

思一作筋力筋力疲不復追踴跳公詩擬南山雄拔千丈峭形  
容逼天真邂逅識其要藩籬吾未窺敢議窮閭奧

昭陵六馬唐文皇戰馬也琢石象之立昭陵前  
客有持此石本示予為賦之

天將剗隋亂帝遣六龍來森然風雲姿颯爽毛骨開  
飈馳不及視山川儼莫回長鳴視八表擾擾萬駑駘秦王  
龍鳳姿魯鳥不足摧腰間大白羽中物如風雷區區數  
豎子搏取若提孩手持掃天空六合如塵埃艱難濟大

業一一非常才維時六驥足績與英衛陪功成鏘八鸞  
玉輅行天街荒涼昭陵闕古石埋蒼苔

顏闔

顏闔古有道躬耕自衣食區區魯小邦不足隱明德輶  
軒來我門聘幣繼金壁山門應使者耕稼不謀國但疑  
誤將命非敢憚行役使者反錫命戶庭空履迹薄俗徇  
世榮截趾履之適所重易所輕隋珠彈飛翼伊人畏照  
影獨往就陰息鼎俎薦忠賢誰能死燔炙念彼藏皮冠



安知獲堯客

送朱世昌使蜀七首

藹藹青城雲娟娟峨眉月隨我西北來照我光不滅  
我在塵土中白雲呼我歸我游江湖上明月濕我衣  
岷峨天一方雲月在我側謂是山中人相望了不隔  
夢尋西南路默數長短亭似聞嘉陵江跳波吹枕屏  
送君無一物清江飲君馬路穿慈竹林父老拜馬下  
不用驚去裝使者我友生聽訟如家人細說為汝評

若逢山中友問我歸何日為話腰脚輕猶堪弄泉石

贈狄崇班季子

狄生臂鷹來見客不會揖踞床吃得雋借筋數禽入短  
後掬豹裘猶濺猩血濕指呼索酒嘗快把長鯨吸半酣  
論刀槩怒髮欲起立北方老獠子狂突尚不繫要須此  
慄悍氣壓邊鋒急夜走追鋒車生斬活離級持歸獻天  
王封侯穩可拾何為走獵師日使羣毛泣

題盧鴻學士堂圖

昔為太室花盧巖在東麓直上登封壇一夜蠶生足徑  
歸不復往巒壑空在目安知有千老舒卷不盈軸一處  
一盧生裘褐蔭喬木方為世外人行止何須錄百年入  
篋笥犬馬同一束嗟予縛世累歸未有茆屋江干百畝  
田清泉映脩竹尚欲逃世名豈須上圖軸

寄周安孺茶

大哉天宇內植物知幾族靈品獨標奇迥超凡草木名  
從姬旦始漸播桐君錄賦詠誰最先厥傳惟杜育唐人

未知好論著始於陸常李亦清流當年慕高躅遂使天下士嗜此偶於俗豈但中土珍兼之異邦鬻鹿門有佳士博覽無不矚邂逅天隨翁篇章互賡續開園顧山下屏跡松江曲有興即揮毫燦然存簡牘伊予素寡愛嗜好本不篤越自少年時低回客京轂雖非曳裾者庇蔭或華屋頗見綺紈中齒牙厭梁肉小龍得屢試糞土視珠玉團鳳與葵花砒砒雜魚目貴人自矜惜捧玩且緘積未數日注卑定知雙井辱於茲自研討至味識五六

自爾入江湖尋僧訪幽獨高人固多暇探究亦頗熟聞  
道早春時攜簞赴初旭驚雷未破蕾采采不盈掬旋洗  
玉泉蒸芳馨豈停宿須臾布輕縷火候謹盈縮不憚頃  
間勞經時廢藏蓄髹筒淨無染箸籠勻且複苦畏梅潤  
侵暖須人氣煥有如剛耿性不受纖芥觸又若廉夫心  
難將微穢瀆晴天敞虛府石碾破輕綠永日遇閒賓乳  
泉發新馥香濃奪蘭露色嫩欺秋菊閩俗競傳誇豐腴  
面如粥自云葉家白頗勝中山醪好是一杯深午窻春

睡足清風擊兩腋去欲凌鴻鵠嗟我樂何深水經亦屢  
讀子吃中冷泉次乃康王谷螭培項曾嘗瓶罌走僮僕  
如今老且懶細事百不欲美惡兩俱忘誰能強追逐薑  
鹽拌白土稍稍從吾蜀尚欲外形體安能徇心腹由來  
薄滋味日飯止脫粟外慕既已矣胡為此羈束昨日散  
幽步偶上天峰麓山圃正春風蒙茸萬旗簇呼兒為佳  
客採製聊亦復地僻誰我從包藏置廚麓何嘗較優劣  
但喜破睡速況此夏日長人間正炎毒幽人無一事午

飯飽蔬菽困卧北窓風風微動窓竹乳甌十分滿人世  
真局促意爽飄欲仙頭輕快如沐昔人固多癖我癖良  
可贖為問劉伯倫胡然枕糟麩

余自城中還道中雲氣自山中來如羣馬奔突  
以手掇開籠收其中歸家雲盈籠開而放之  
作攘雲篇

物役會有時星言從高駕道逢南山雲歛吸如電過竟  
誰使令之袞袞從空下龍移相排拶鳳舞或頽亞散為

東郊霧凍作枯樹稼或飛入吾車偏仄入肘膊搏取置  
笥中提攜反茅舍開緘仍放之掣去仍變化雲兮汝歸  
山無使達官怕

遊山呈通判承議寫寄參寥師

煌煌世胄餘夫子非碌碌由來有詩書所以能絕俗得  
官本河朔瓜期未易促扁舟下南來逸駕追鳴鵠遇勝  
即倘佯風餐兼露宿嗟予偶傾蓋一笑外羈束杖策每  
過從相攜訪山谷東風披鮮雲繡錯出林麓松門有時



盡幽景無斷續崖轉聞鐘聲林疎見華屋銜山餘落景  
歸迹猶躑躅誰云鄴下歡往事不可復吾曹二三事取  
樂亦云足願公寄新詩一一能見錄船頭行北歸囊橐  
有美玉塵埃京洛人亦與洗心目

和郭功父韻送芝道人遊隱靜

觀音妙智力應感隨緣度芝師訪東坡寧辭萬里步道  
義偶相契十年同去住行窮半世間又欲浮盃渡我願  
焚囊鉢不作陳俗具會取却歸時只是而今路

次韻魯直戲贈

昨夜試微涼，汗衾初退紅。我願隨秋風，隨身入房櫳。君  
王不好事，只作好驚鴻。細看卷蠶尾，我家真栗蓬。

夜坐與邁聯句

清風來無邊，明月翳復吐。自松聲滿虛空，竹影侵半戶。

邁暗枝有驚鵲，壞壁鳴饑鼠。自露葉耿高梧，風螢落空

廡。邁微涼感團扇，古意歌白紵。自樂哉今夕遊，復此陪

杖屨。邁傳家詩律細，已自過宗武。短詩膝上成，聊以慰

懷祖自

寄傲軒

先生英妙年一掃千兔禿仕進固有餘不肯踐場屋通  
闌何所傲傲名非傲俗定知軒冕中享榮不償辱豈無  
自安計得失猶轉轂先生獨揚揚憂患莫能瀆得如虎  
挾乙失若龜藏六茅簷聊寄寓俛仰亦自足東坡無邊  
春方寸盡藏蓄醉哦傍若無獨侑一樽醪床頭車馬道  
殘月掛疎木朝客紛擾時先生睡方熟

榆

我行汴堤上，厭見榆陰綠。千株不盈畝，斬伐同一束。及  
居幽囚中，亦復見此木。蠹皮溜秋雨，病葉埋牆曲。誰言  
霜雪苦，生意殊未足。坐待春風至，飛英覆空屋。

槐

憶我初來時，草木向衰歇。高槐雖驚秋，晚蟬猶抱葉。淹  
留未云幾，離離見疎筴。栖鴉寒不去，哀叫飽啄雪。破巢  
帶空枝，踈影掛殘月。豈無兩翅羽，伴我此愁絕。

竹

今日南風來吹亂庭前竹  
低昂中音會甲刃紛相觸  
蕭然風雪意可折不可辱  
風霽竹已一作亦回猗猗散青玉

故山今何有秋雨荒籬菊  
此君知健否歸掃南軒竹

柏

故園多珍木翠柏如蒲葦  
幽囚無與樂百日看不已  
時來拾流膠一作肪未忍踐落子  
當年誰所種少長與我齒

仰視蒼蒼榦所閱固多矣  
應見李將軍膽落溫御史

東坡全集卷二十七

欽定四庫全書薈要卷一萬四千八百六十

集部

東坡全集卷二十八

宋 蘇軾 撰

詩一百十首

問淵明或曰東坡此詩與淵明反此非知言也蓋亦相引以造意言者未始相非也元

祐五年  
十月日

子知神非形何復異人天豈惟三才中所在靡不然我引而高之則為星斗懸我散而卑之寧非山與川三皇雖云沒至今在我前八百要有終彭祖非永年皇皇謀

一醉發此露槿妍有酒不辭醉無酒斯飲泉立善求我  
譽饑人食饒涎委運憂傷生憂一作運去生亦還縱浪大  
化中正為化所纏應盡便須盡寧復事此言

題雲龍草堂石磬

折為督郵腰懸作山人室殊非濮上音信是泗濱石  
朱亥墓

昔日朱公子雄豪不可追今來遊故國大塚屈稱兒平  
日輕公相千金棄若遺梁人不好事名字寄當時魯史



盜齊豹求名誰復知慎無怨世俗猶不遭仲尼

嚴顏碑

先主反劉璋兵意頗不義孔明古豪傑何乃為此事劉  
璋固庸主誰為死不二嚴子獨何賢談笑傲礎几國亡  
君已執嗟子死誰為何人刻山石使我空涕淚吁嗟斷  
頭將千古為病悻

峴山

遠客來自南游塵昏峴首過關無百步曠蕩吞楚數登

高忽惆悵千載意有偶所憂誰復知嗟我生苦後團團  
山上檜歲歲閱榆柳大才固已殊安得同永久可憐山  
前客倏忽星過雷賢愚未及分來者當自剖

驪山

君門如天深幾重君王如帝坐法官人生難處是安穩  
何為來此驪山中復道凌雲接金闕樓觀隱煙橫翠空  
林深霧暗迷八駿朝東暮西勞六龍六龍西幸峨眉棧  
悲風便入華清院霓裳蕭散羽衣空麋鹿來游猿鶴怨

我上朝元春半老滿地落花無人掃羯鼓樓高掛夕陽  
長生殿古生青草可憐吳楚兩醢雞築臺未就已堪悲  
長楊五柞漢幸免江都樓成隋自迷由來留連多喪國  
晏安酖毒因奢惑五風十愆古所戒不必驪山可亡國

和子由除日見寄

薄官驅我西遠別不容惜方愁後會遠未暇憂歲夕強  
歡雖有酒冷酌不成席秦烹惟羊羹隴饌有熊腊念為  
兒童歲屈指已成昔往事今何追忽若箭已釋感時嗟

事變所得不償失府卒來驅儼矍鑠驚遠客愁來豈有  
魔煩汝為攘磔寒梅與凍杏嫩萼初似麥攀條為惆悵  
玉蕊何時折不憂春豔晚行見棄夏覈人生行樂耳安  
用聲名籍胡為獨多感不見膏自炙詩來苦相寬子意  
遠可射依依見其面疑子在咫尺兄今雖小官幸忝佐  
方伯北池近所鑿中有汧水碧臨池飲美酒尚可消永  
日但恐詩力弱鬪健未免馘詩成十日到誰謂千里隔  
一月寄一篇憂愁何足擲

過巴東縣不泊聞頗有萊公遺迹

萊公昔未遇寂寞在巴東聞道山中樹猶餘手種松江  
山養豪俊禮數困英雄執版迎官長趨塵拜下風當年  
誰刺史應未識三公

白帝廟

朔風吹入峽慘慘去何之共指蒼山路來朝白帝祠荒  
城秋草滿古樹野藤垂浩蕩荆江遠淒涼蜀客悲遲回  
問風俗涕泗閔興衰故國依然在遺民豈復知一方稱

警蹕萬乘擁旌旗遠略初吞漢雄心豈在夔崎嶇來野  
廟閔默愧常時破甑蒸山麥長歌唱竹枝荆邯真壯士  
吳柱本經師失計雖無及圖王固已奇君餘帝王號皎  
皎在門楣

戎州

亂山圍古郡市易帶羣蠻庾嶺春耕少孤城夜漏閒往  
時邊有警征馬去無還自頃方從化年來亦歎關頗能  
貪漢布但未脫金銀何足爭強弱吾民盡玉顏

孔周翰嘗為仙源令中秋夜以事留於東武官  
舍時陳君榮右王君建中皆在郡其後十七  
年中秋周翰持節過郡而二君已亡感時懷  
舊留詩於壁又其後五年中秋軾與客飲于

超然臺聞周翰乞此郡客有

缺文

屈指從來十七年交親零落一潜然  
嬋娟再見中秋月  
依舊清輝照客眠

右孔

壞筆題詩已五年故人風物兩依然  
定知來歲中秋月

又照先生枕麴眠

更邀明月說明年  
記取孤吟孟浩然  
此去宦遊如傳舍  
揀枝驚鵲幾時眠

獲鬼章二十韻

青唐有逋寇  
白首已窮妖  
竊據臨洮郡  
潛通講渚橋  
廟謀周召虎  
邊帥漢班超  
堅壘千兵破  
連航一炬燒  
擒女從窟穴  
奏捷上煙霄  
詭異人圖像  
驩娛路載謠  
干誅非一事  
伐叛自先朝  
取道經陵寢  
前期告廟祧  
西來聞幾



日面縛見今朝二聖臨雲陞千官溢海潮載囚車輶輓  
失主馬蕭條橫拜如蹲犬胡裝尚衣貂理卿辭具服譯  
長舌初調緩死恩殊厚求生尾屢搖慈仁逢大母寬厚  
戴唐堯赤手真擒虎和羹未賜臬藁街虛授首東市偶  
全腰困獸何須殺遺雛或可招威聲西振夏武節北通  
遼帝道有強弱天時或長消羌情防報復軍勝忌矜驕  
慎重關西將奇功勿再要

光祿庵二首

文章恨不見文園禮樂方將訪石泉何事庵中着光祿  
枉教閒處筆如椽

城中太守的何人林下先生非我身若向庵中覓光祿  
雪中履迹鏡中真

過木樨觀

石壁高千尺微蹤遠欲無飛簷如劔寺

出劔門東望上寺宇彷彿可見

古柏似仙都許子嘗高遁行舟悔不迂斬蛟聞猛烈提  
劔想崎嶇寂寞棺猶在脩崇世已愚隱居人不識化去

俗爭吁洞府煙霞遠人間爪髮枯飄飄乘倒景誰復顧  
遺軀

觀開西湖次吳左丞韻

偉人謀議不求多事定紛紛自唯阿盡放龜魚還綠淨  
肯容蕭葦障前坡一朝美事誰能絕百尺蒼崖尚可磨  
天上列星當亦喜月明時下浴明波

荊州十首

遊人出三峽楚地盡平川北客隨南賈吳檣間蜀船江

侵平野斷風捲白沙旋欲問興亡意重城自古堅

南方舊戰國慘澹意猶存慷慨因劉表淒涼為屈原廢  
城猶帶井古姓聚成村亦解觀形勝昇平不敢論

楚地濶無邊蒼茫萬頃連耕牛未嘗汗投種去如捐農  
事誰當勸民愚亦可憐平生事遊惰那得怨凶年

朱檻城東角高王此望沙江山非一國烽火畏三巴戰  
骨淪秋草危樓倚斷霞百年豪傑盡擾擾見魚鰕

沙頭煙漠漠來往厭喧卑野市分麈鬧官帆過渡遲遊

人多問卜僮叟盡攜龜日暮江天靜無人唱楚詞  
太守王夫子山東老俊髦壯年聞猛烈白首見雄豪食  
雁君應厭驅車我正勞中書有安石慎勿賦離騷

殘牖多風雪荆人重歲時客心何草草里巷自嬉嬉爆  
竹驚隣鬼驅讎逐小兒故人應念我相望各天涯

江水深成窟潛魚大似犀赤鱗如琥珀老枕勝玻璃上  
客舉雕俎佳人搖翠篔登庖更作器何以免屠割

北雁來南國依依似旅人縱橫遭折翼感惻為沾巾平

日誰能挹高飛不可馴故人持贈我三嗅若為珍  
柳門京國道驅馬及春陽野火燒枯草東風動綠芒北  
行連許鄧南去極衡湘楚境橫天下懷王信弱王

渝州寄王道祖

曾聞五月到渝州水拍長亭砌下流惟有夢魂長繚繞  
莫論唐史更綢繆舟經故國歲時改霜落寒江波浪收  
歸夢不成冬夜永厭聞船上報更籌

過安樂山聞山上木葉有文如道士篆符云此

山乃張道陵所寓二首

天師化去知何在玉印相傳世共珍  
故國子孫今尚死滿山秋葉豈能神

真人已不死外慕墮空虛猶餘好名意  
滿樹寫天書

涪州得山胡善鳴出黔中

終日鎖筠籠回頭惜翠茸誰知聲嘒嘒  
亦自意重重夜宿煙生浦朝鳴日上峰  
故巢何足戀鷹隼豈能容

巫山廟上下數十里有烏鳶無數取食於行舟

之上舟人以神之故亦不敢害

羣飛來去噪行人得食無憂便可馴江上饑鳥無足怪  
野鷹何事亦頻頻

夷陵縣歐陽永叔至喜堂

夷陵雖小邑自古控荆吳形勝今無用英雄久已無誰  
知有文伯遠謫自王都人去年年改堂傾歲歲扶追思  
猶咎呂感歎亦憐朱

時朱太守為  
公築此堂

舊種孤楠老新霜一

橘枯清篇留峽洞醉墨寫邦圖

三游洞有詩夷陵  
後有留題處

故老



問行客長官今白鬚著書多念慮許國減歡娛寄語公  
知否還須數倒壺

入峽

自昔懷幽賞今茲得縱探長江連楚蜀萬派瀉東南合  
水來如電點波綠似藍餘流細不數遠勢競相參入峽  
初無路連山忽似龕縈迂收浩渺感縮作淵潭風過如  
呼吸雲生似吐含墜崖鳴窸窣垂蔓綠穆穆冷翠多崖  
竹孤生有石楠飛泉飄亂雪恠石走驚驂絕澗知深淺

樵僮忽兩三人言偶逢郭沙岸可乘籃野戍荒州縣邦  
君古子男放衙鳴晚鼓留客薦霜柑聞道黃精草叢生  
綠玉簪盡應充食飲不見有彭朐氣候冬猶暖星河夜  
半涵遺民悲昶行

孟昶從此入覲  
王衍亦蜀主

舊俗接魚蠶版屋漫

無瓦巖居窄似庵伐薪常冒嶮得米不盈甌歎息生何  
陋劬勞不自慚葉舟輕遠泝大浪固嘗諳矍鑠空相視  
嘔啞莫與談蠻荒安可駐幽邃信難媿獨愛孤棲鷓高  
超百尺嵐橫飛應自得遠颺似無貪振翮游霄漢無心

顧雀鷓塵勞世方病局束我何堪盡解林泉好多為富  
貴酣試看飛鳥樂高遁此心甘

題贈田辨之琴姬

流水隨絃滑清風入指寒坐中有狂客莫近繡簾彈  
四十年前元夕與故人夜遊得此句

午夜朧朧淡月黃夢回猶有暗塵香縱橫滿地霜槐影  
寂寞蓮燈半在亡

戲孫公素

投扇昔年笑溫嶠握刀晚歲戰劉郎不須戚戚如馮衍  
便與時時說李陽

南康望湖亭

一本云過洞庭

八月渡長湖蕭條萬象疎

一本云蕭湘景物疎

秋風片帆急暮靄

一本一作雨一山孤許國心猶在康時術已虛

術一作業岷峨家萬

里投老得歸無

半山亭

登嶺勢巍巍蓮峰太華齊凭欄紅日早回首白雲低松

柏月中老猿猴物外啼禪師吟絕後千古指人迷

儋耳山

突兀隘空虚他山總不如君看道傍石盡是補天餘

次韻聞復上人

前身本同社宿業獨臨邊一悟鏡空老始知圓澤賢歸  
心忘犢佩生術寄羊鞭不似歐陽子空留六一泉

宋復古畫瀟湘晚景圖三首

西征憶南國堂上畫瀟湘照眼雲山出浮空野水長舊

遊心自省信手筆都忘會有衡陽客來看意渺茫  
落落君懷抱山川自屈蟠經營初有適揮洒不應難江  
市人家少煙村古木攢知君有幽意細細為尋看

咫尺殊非少陰晴自不齊徑蟠趨後崦水會赴前溪自  
說非人意曾經是馬蹄他年宦遊處應話劔山西

儋州二首

小邑浮橋外青山石岸東茶槍燒後出麥浪水前空萬  
戶不禁酒三年真識翁結茅來此住歲晚有誰同

荔子幾時熟花頭今已繁探春先揀樹買夏欲論園居  
士常攜客參軍許扣門

周參軍家  
多荔子

明年更有味懷抱鬧

諸孫

一云帶  
諸孫

海上道人傳以神守氣訣

但向起時作還於作處收蛟龍莫放睡雷雨直須休要  
會無窮火嘗觀未盡油夜深人散後惟有一燈留

曹溪夜觀傳燈錄燈花落一僧字上口占

山堂夜岑寂燈下看傳燈不覺燈花落茶毗一個僧

贈包安靜先生三首

皓色生甌面堪稱雪見羞東坡調詩腹今夜睡應休

偶謁

大中精藍中故人烹日注茶果不虛示故詩以記之

建茶三十片不審味如何奉贈包居士僧房戰睡魔

昨日

點日注極佳點此復云罐中餘者可示及舟中滌神耳

野菜初出珍又珍送與安靜病酒人便須起來和熱喫  
不消洗面裹頭巾

杭州次周燾韻遊天竺觀激水



道眼轉丹青常於寂處鳴  
早知雨是水不作兩般聲

過海得子由書

經過廢來久有弟忽相求  
門外三竿日江闕一葉秋  
蕭疎悲白髮漫浪散窮愁  
世事江聲外吾生幸且休

去歲與子野遊逍遙堂  
日欲沒因並西山叩羅浮  
道院至巳二鼓矣遂宿于西堂  
今歲索居儋耳子野復來  
相見作詩贈之

往歲追歡地寒窓夢不成  
笑談驚半夜風雨暗長檠  
雞

唱山椒曉鐘鳴霜外聲只今那復見髣髴似三生

元祐五年十二月十二日同景文義伯聖途次

元伯固仲蒙游七寶寺題竹上

結根豈殊衆脩柯獨出林孤高不可恃歲晚霜風侵

泗州過倉中劉景文老兄戲贈一絕

既聚伏波米還數魏舒籌應笑蘇夫子僥倖得湖州

戲題巫山縣用杜子美韻

巴俗深留客吳儂但憶歸直知難共語不是故相違東

縣聞銅臭江陵換袂衣  
丁寧巫峽雨慎莫暗朝暉

初貶英州過杞贈馬夢得

萬古仇池穴歸心負雪堂  
殷勤竹林詠猶得比山王

荅晁以道索書

閱世真難記如公自不忘  
其於書太簡正以懶相妨

大老寺竹間閣子

殘花帶葉暗新筍出林香  
但見竹陰綠不知汧水黃  
樹高傾隴鳥池浚落河魴  
栽種良辛苦孤僧瘦欲尪

和廬山上人竹軒

洞外復空中千千萬萬同勞師  
向竹頌清是阿誰風

歎塞來亭

蠢爾氏羌國天誅亦久稽  
既能知面內不復議征西  
斤堠銷烽火邊城息鼓聲  
輸忠脩貢職棄過為黔黎  
雪滿流沙靜雲沉太白低  
巍巍二聖治盛德古難齊

觀臺

三界無所住一臺聊自寧  
塵勞付白骨寂照起黃庭  
殘

磬風中嫋孤燈雪後青須防童子戲投瓦犯清冷

吳江岸

曉色兼秋色蟬聲雜鳥聲壯懷銷鑠盡回首尚心驚

嘲子由

堆几盡埃簡攻之如蠹蟲誰知聖人意不在古書中

無題

六秩行當啓區中緣更疎不貪為我寶安步當君車故  
國多喬木先人有弊廬誓將閒散好不着一行書

元祐九年立春

熊白來山北，豬紅削劍南。  
春盤得青韭，臠酒寄黃柑。

扶風天和寺

遠望若可愛，朱欄碧瓦溝。  
聊為一駐足，且慰百回頭。  
水落見山石，塵高昏市樓。  
臨風莫長嘯，遺涕浩難收。

再贈常州報恩長老

薦福老懷真，巧便淨慈兩。  
本更尖新，憑師為作鐵門限。  
準備人間請話人。

聞洮西捷報

漢家將軍一文佛詔賜天池八尺龍露布朝馳玉關塞  
捷書夜到甘泉宮似聞指揮築上郡已覺談笑無西戎  
牧臣不見天顏喜但驚草木放一作春容

三萼牡丹

風雨何年別留真向此邦至今遺恨在巧過不成雙

己未十月十五日獄中恭聞太皇太后不豫有

赦作詩

庭柏陰陰書掩門  
烏知有赦鬧黃昏  
漢宮自種三生福  
楚客還招九死魂  
縱有鋤犁及田畝  
已無面目見丘園  
只應聖主如堯舜  
猶許先生作正言

題李景元畫

聞說神仙郭恕先  
醉中狂筆勢瀾翻  
百年寥落何人在  
只有華亭李景元

謝人惠雲巾方烏二首

燕尾稱呼理未便  
剪裁雲葉却天然  
無心只是青山物



覆頂宜歸紫府仙，轉覺周家新樣俗。  
後周頭中起未容陶令

舊名傳鹿門，佳士勤相贈。黑霧玄霜合比肩。  
皮襲美贈天隨子紗

中詩云：掩斂乍疑裁，黑霧輕明渾似帶，玄霜

胡鞞短鞞格，麤疎古雅無。如此樣殊妙，手不勞盤作鳳。

晉永嘉中有鳳頭鞋輕身只欲化為鳧，魏風褊儉堪羞葛。楚客蒙

華可笑珠擬學，梁家名解脫。  
武帝作解脫履便於禪坐作跏趺。

謝宋漢傑惠李承晏墨

老松燒盡結輕花，妙法來從北李家。翠色冷光何所似

牆東鬢髮墮寒鴉

被命南遷塗中寄定武同僚

人事千頭及萬頭得時何喜失時憂只知紫綬三公貴  
不覺黃梁一夢遊適見恩綸臨定武忽遭分職赴英州  
南行若到江干側休宿潯陽舊酒樓

李委吹笛

并引

元符五年十二月十九日東坡生日也置酒赤壁磯下  
踞高峯俯鵲巢酒酣笛聲起於江上客有郭石二生頗

知音謂坡曰笛聲有新意非俗工也使人問之則進士  
李委聞坡生日作新曲白鶴南飛以獻呼之使前則青  
巾紫裘要笛而已既奏新曲又快作數弄嘹然有穿雲  
裂石之聲坐客皆引滿醉倒委袖出嘉紙一幅曰吾無  
求於公得一絕句足矣坡笑而從之

山頭孤鶴向南飛載我南遊到九疑下界何人也吹笛  
可憐時復犯龜茲

書黃筌畫翎毛花蝶圖二首

短翎長喙喜喧卑  
曳練雙翔亦自奇  
賴有黃鸝鬪嫫好  
獨依蘚石立多時

綠陰青子已愁人  
忍見中庭燕麥新  
怡憫劉郎今白首  
時來看卷覓餘春

次韻王定國得晉卿酒相留夜飲

短衫壓手氣橫秋  
更着仙人紫綺裘  
使我有名全是酒  
從他作病且忘憂  
詩無定律君應將  
醉有真鄉我可俟  
且倒餘樽盡今夕  
睡蛇已死不須鉤

偶於龍井辨才處得歛硯甚奇作小詩

羅細無文角浪平  
半九犀壁浦雲泓  
午窓睡起人初靜  
時聽西風拉瑟聲

秋晚客興

草滿池塘霜送梅  
疎林野色近樓臺  
天圍故越侵雲盡  
潮上孤城帶月迴  
客夢冷隨楓葉斷  
愁心低逐雁聲來  
流年又喜經重九  
可意黃花是處開

陳伯比和回字復次韻

下里馮生寧屑去湖海陳侯猶肯來詩書好在家四壁  
蒲柳翁然城一隈騎上下山亦疎矣儵從容出何為哉  
市橋十步即塵土晚雨瀟瀟殊未回

廣陵後園題申公扇子

露葉風枝曉自勻綠陰青子淨無塵閒吟遶屋扶疎句  
須信淵明是可人

山光寺回次芝上人韻

關裏清遊借隙光醉時真境發天藏夢回拾得吹來句

十里南風草木香

與道源遊西莊遇齊道人同住草堂為齊書此  
桑麻已零落藻荇復銷沉園宅在人境歲時傷我心  
穿南埭路遙望北山岑欲與道人語跨鞍聊一尋

寒食夜

漏聲透入碧窓紗人靜鞦韆影半斜  
沉麝不燒金鴨冷  
淡雲籠月照梨花

荅子勉三首

君不登郎省還應上諫坡才高殊未識歲晚幸無他  
樞馬羸難出鄰雞凍不歌寒爐餘幾火灰裏撥陰何

驚人得佳句或以傲王公處士還清節滑稽安足雄  
深沉似康樂簡遠到安豐一點無俗氣相期林下風  
欲舞腰身柳一窠小梅推拍大梅歌舞餘片片梨花落  
爭奈當塗風物何

送楊奉禮

譜牒推闕右風流出靖恭時情任險陂家法故雍容南



去河千頃大水中相別餘惟酒一鍾更誰哀老子令得放疎

慵

別東武流杯

莫笑官居如傳舍故應人世等浮雲百年父老知誰在  
惟有雙松識使君

走筆謝呂行甫惠子魚

卧沙細肋吾方厭通印長魚誰肯分好事東平貴公子  
貴人不與與蘇君

訪詹使君食槐芽

一作冷淘

枇杷已熟粲金珠，桑落初嘗滌玉蛆。  
暫借垂蓮十分盞，來澆空腹五車書。  
青浮卵盃槐芽餅，紅點冰盤藿葉魚。  
醉飽高眠真事業，此生有味在三餘。

贈虔州慈雲寺鑒老

居士無塵堪洗沐，道人有句借宣揚。  
窓間但見蠅鑽紙，門外惟聞佛放光。  
徧界難藏真薄相，一絲不掛且逢場。  
却須重說圓通偈，千眼薰籠是法王。

和方南圭寄迓周文之三首

共惜相從一寸陰，酒杯雖淺意殊深。且同月下三人影，

聊豁

一作莫作

天涯萬里心。東嶺舊

一作近

開松竹徑，南堂初

絕斧斤。音知君善頌，如張老猶望攜壺更一臨。

數畝蓬蒿古縣陰，小窓明快夜堂深。也知卜築非真宅，

聊欲跣趺看此心。聞道攜壺問奇字，更宜登木助徽音。

一云振履出商音

相娛北戶江千頃，直下都無地可臨。

此生真欲老牆陰，却掃都忘歲月深。拔薤已觀賢守政，

摘蔬聊慰故人心風流賀監常吳語憔悴鍾儀獨楚音  
治狀兩邦俱第一潁川歸去肯重臨

壺中九華詩

并引

湖口人李正臣蓄異石九峯玲瓏宛轉若窓櫺然余欲  
以百金買之與仇池石為偶方南遷未暇也名之曰壺  
中九華且以詩識之

我家岷蜀最高峰

一作清溪電  
轉失雲峯

夢裏猶驚翠掃空五嶺

莫愁千嶂外九華今在一壺中天池水落層層見

一作石泉

影落涓涓玉女窓  
明處處通念我仇池太孤絕  
百金歸買

小碧一作玲瓏

留別登州舉人

身世相忘久自知  
此行閒看古黃睡  
自非北海孔文舉  
誰識東萊太史慈  
落筆已吞雲夢客  
抱寒欲訪水仙師  
莫嫌五日怱怱守  
歸去先傳樂職詩

過海

參橫斗落轉一作轉欲  
三更苦雨終風也  
解晴雲散月明誰

點綴天容海色本澄清空餘魯叟乘桴意無復

一作軒  
粗識

過嶺寄子由三首

七年來往我何堪又試曹溪一勺甘夢裏似曾遷海外  
醉中不覺到江南波生濯足鳴空澗霧遶征衣滴翠嵐  
誰遣山雞忽驚起半巖花雨落毵毵

投章獻策謾多談能雪寃忠死亦甘一片丹心天日下  
數行清淚嶺雲南光榮歸佩呈佳瑞瘴癘幽居弄曉嵐

從此西風庾梅謝却迎誰與馬穆穆

山林瘴霧老難堪歸去中原茶亦甘有命誰怜終反北  
無心却笑亦巢南蠻音慣習疑僮語脾病縈纏帶嶺嵐  
賴有祖師清淨水塵埃一洗落穆穆

歌白塔舖

甘山廬阜鬱長望林隙依稀

一作  
熹微

漏日光吳國晚蠶初

斷葉占城早稻欲移秧迢迢澗水隨人急冉冉巖花撲

馬香望眼儘從窮

一作

飛鳥遠白雲深處是吾鄉

西蜀楊者二十年前見之甚貧今見之亦貧所  
異於昔者蒼顏華髮耳女無美惡富者妍士  
無賢不肖貧者鄙使其逢時遇合豈減當世  
之士哉頃宿長安驛舍聞泣者甚怨問之乃  
昔富而今貧者乃作一詩今以贈楊君

孤村漸一作微

雨逐秋涼逆旅愁人怨夜長不寐相看惟

樾馬愁吟一作悲歌

互荅有寒螿天寒滯穗猶橫畝歲晚空

機尚倚牆勸爾一杯聊復睡人間貧富海茫茫



贈人

別後休論信息疎，仙凡自古亦殊途。  
蓬山路遠人難到，霜柏威高道轉孤。  
舊賞未應亡楚國，新詩聞已滿皇都。  
誰憐澤畔行吟者，目斷長安貌欲枯。

趙成伯家有妹麗，僕忝鄉人不肯開樽徒吟春。  
雪謹依元韻以當一笑。

繡簾朱戶未曾開，誰見梅花落鏡臺。  
試問高吟三十韻

俗云檢驗死秀才何如低唱兩三杯。  
世傳陶穀學士買帶上有詩三十韻。  
得党太尉家故妓。

遇雪陶取雪水烹團茶謂妓曰党家應不識此妓曰彼  
麤人安有此景但能於銷金暖帳下淺斟低唱喫羊羔  
兒酒耳陶默然媿其言莫嫌衰髻聊相映須得纖腰與共回知道

文君隔青鎖梁園賦客敢言才

聊答來句義取婦人而已罪過罪過

東坡全集卷二十八

謹案卷二十七第三頁前四行者舊何人在刊本  
者訛音據施本改


第二十二頁後二行子咤中冷泉刊本脫泉字據  
施本增

卷二十八第四頁後二行荆邯真壯士刊本邯訛  
都據後漢書改

第四頁後六行亂山圍古郡刊本圍訛團據施本  
改

第七頁後七行戰骨淪秋草刊本淪訛淪據施本

改



總校官庶吉士臣張能照

校對官庶吉士臣陳文樞

謄錄監生臣周學澂